

**PAS akan bawa Bil Perhimpunan Aman ke mahkamah**  
**Malaysiakini.com**  
**November 25 ,2011**  
**by Hafiz Yatim**

Tekanan membantah Rang Undang-Undang Perhimpunan Aman semakin memuncak, dengan PAS dijadual memfailkan permohonan semakan kehakiman dalam usahanya untuk menghalang Parlimen meluluskannya.

Timbalan Presiden PAS, Mohamad Sabu dan dua ahli parlimen parti itu - Dr Mohd Hatta Ramli (Kuala Krai) dan Dr Dzulkefly Ahmad (Kuala Selangor) - akan menjadi plaintif.

Mat Sabu berkata, rang undang-undang Perhimpunan Aman itu melarang hak untuk berhimpun dan mengadakan demonstrasi jalanan.

Katanya, alasan yang diberikan oleh kerajaan BN adalah tidak logik kerana hampir setiap minggu Umno mengadakan protes jalanan di Pulau Pinang, tetapi ia tidak menjejaskan pelaburan di negeri itu, dan masih menjadi yang tertinggi di kalangan negeri-negeri di Malaysia.

Oleh itu, beliau mempersoalkan mengapakah kerajaan mahu menghadkan hak tersebut dengan mengenakan notis 30 hari untuk mengadakan perhimpunan aman.

Malah, pihak berkuasa Myanmar hanya memerlukan lima hari, kata Mat Sabu sambil bertanya apakah rakyat Malaysia akan menjadi lebih teruk daripada Myanmar, yang dikenali pemerintahan diktator.

Anggota jawatankuasa pusat PAS, Mohd Hanipa Maidin, yang juga penasihat undang-undang parti itu pula berkata, beliau telah meneliti rang undang-undang itu dan mendapati ia melanggar perlembagaan.

Kerana itulah, tambahnya, PAS akan memfailkan semakan kehakiman, supaya mahkamah dapat menyekatnya daripada menjadi undang-undang dan mengisytiharkannya sebagai tidak sah.

Ia pernah dilakukan sebelum ini di negara-negara lain dan ini merupakan yang pertamakali di Malaysia.

Copyright © 1999-2007 Mkini Dotcom Sdn. Bhd  
<http://www.malaysiakini.com/news/182463>